

هوالبهی

ای اللّٰهک قوللری و جمال ابهانک منجدبلری انوار رحمانیت مشرق احدیتدن تاباندر و نفحات گلشن هویت مهتّب عنایتدن وزاندر شمع هدی محفل صفاده یانار و نور صاچار و بحر وفا طوفان عطا ایله امواجی بربرینه چارپار نسیم عنبرشمیدر که حیاتبخش مشام اهل نعیمدر و عبیر روضه ربّ رحیمدر که طیب طیب محافل علییندر خوان نعمت آچلمشدر مائده سمائیه دیزلمشدر انجمن صفا ترتیب اولنمشدر بزم وفا دونادلمشدر آواز و ترانه باشلانمشدر و چنگ و چغانه آوازه آغاز ایلمشدر جام سرشار حقّ دوره گلمشدر باده معرفت قینامشدر چمن و دمن یشیلنمشدر صحرا و قرا سبز و خرم اولمشدر فراش باد صبای الهی قماش مرصع حقائق و معانی یایمشدر دریای الطاف رحمانی موجه گلمشدر درّ و گوهر معادن یزدانی ساحلرله صاچلمشدر باغبان احدیت صحن چمنده ترتیب جشن مزین ایلمشدر نرگس حیران قالمشدر بنفشه مست و نشوان اولمشدر نسرین و یاسمین هبوب نسیم شدید ایله پریشان اولمشدر سوسن آزادک زبان خاموشی گویان اولمشدر و سرو شیرین خرام کنار جویارده قامت اوزاتمشدر گلشن تجلی هر جهتجه حاضر و مهیا اولمشدر افسر سلطان گل طرف چمنندن پیدا اولمشدر مرغان گلشن نوبتن اولمشدر میمنت قدمه و تهنت حضوره انواع ساز و آواز ایله آغاز آهنگ راز ایلمشدر عندلیب ادیب گلستان اولوب لسان محامد و نعوت آچدی و دردانه حقائق و گوهر معانی صاچدی قمری و فاخته عشقباخته آه و فغانه باشلدی و بلبل گرفتار جمال پرانوار و روی آبدار دلدار گلی نگران اولوب باقه باقه یانه یانه آغلیه آغلیه فریاد ایلدی بالجمله قیامت ارواح و قلوب قویدی زلزله ارکان عالمه دوشدی و ولوله صحن چمنه یاییلدی نعره مستان و های و هوی عاشقان عنان افلاکه چیقدی نفحات قدس اسدی مشام طالبان معطر اولدی و دماغ مشتاقان معنبر اولدی حیات باقیه میذول اولدی جمال رحمانی مشهود اولدی جواهر عرفان دامن یزدانه نثار اولدی زمره عاشقان ایله میدان قریان دولدی صحرای وفا تنهای کشتگان ایله مالامال اولدی خون شهیدان سیل روان اولدی لکن غافلر حالا اویقوده درلر جاهلر حالا زاویه غفلتده درلر کوران محروم اولمشدر صاغرلر مهجور اولمشدر بشارت سزه عنایت سزه موهبت سزه رحمت سزه نعمت سزه مخصوص اولمشدر ای اللّٰهک قوللری

عبدالبهاء عباس